


TEZAUUR LITURGIC
21 AUGUST

SLUJBA
SF. CUVIOASE
MARTA
MILIUKOVA
DE LA
DIVEEVO



MOSCOVA, 2000



Служба прп. Марфы Дивеевской

НА МАЛОЙ ВЕЧЕРНИ

На Господи, возвах: стихиры, глас 6

Приидите, вернии людие, / во святую обитель
Дивеевскую, / иже Четвертым Жребием Божия
Матере нарицается, / ублажим верную рабу
Владычицы Пресвятыя Богородицы
преподобную Марфу / и, припадаючи к честным
и многоцелебным мощем, / яко заповеда
преподобный Серафим, / усердно
помолимся: // Помяни нас, госпоже и матери
наша, // у Престола Божия во Царствии
Небеснем.

Како по достоинству воспоим мать нашу
Марфу, / дивную начальницу Дивеева
Небеснаго, / от юности благодать Святаго Духа
стяжавшую / и ныне у Престола Пресвятыя
Троицы молящуюся о спасении душ наших.
Киими недостойными усты / восхвалим ныне
вселюбезную мать нашу Марфу, / кротостию,
чистотою, послушанием совершенным / в
отрочестве Богу угодившую, / собеседницу
великаго старца Серафима, / дивную
молчальницу и хранительницу тайн Божиих об
обители Дивеевской, / подающую усердно

просящим мир и велию милость.

Слава, глас 5 Подобен: «Радуйся»

Боголюбива, милостива, смиренна
мудрованием/ и любви исполнена явилася еси,/
Невесто Христова Марфо,/ аки ангел на земли
поживши,/ кончину блаженную в юных летех
приятти сподобилася еси/ и венец улучшить
нетленный,/ молися о любовьию чтущих тя.

И ныне праздника, глас 6

Приидите, всемирное успение/ Всенепорочныя
Богородицы празднуем,/ днесь бо Ангели
торжествуют/ честное преставление Божия
Матере/ и к веселию нас, земных, призывают/
вопити немолчным гласом:/ радуйся,
преставльпаяся от земли/ и к Небесным
обителем пресельнаяся./ Радуйся, яже
ученический лик облаком легким во едино
сбравшая./ Радуйся, упование и спасение
наше,/ Тя бо христианский род непрестанно
ублажает.

Прокимен дне.

На стиховне стихирь, глас 2

Всех радостей Радость,/ Всеблагословенная
Богородица Дева,/ радости вечныя тебе
сподобила есть,/ госпоже и мати наша Марфо
преподобная,/ яко служительницу Свою верную.
Радостно на подвиги потекла еси,/ ограждаема

силою Божественною, / Богородицею избранная
мати преподобная, Марфо славная, / молися о
чтущих тя верно.

Великий Ангельский образ восприявши, /
начальницею Небеснаго Дивеева / ты явилася
еси, преподобная Марфо, / помолися за чтущия
тя.

Слава, глас 1

Отроковице благодатная Богородице Марие, /
радости вся исполнила еси, / даровавши верным
обитель Свою святую, / иже Четвертым жребием
именуется, / небесною начальницею обители
избравши отроковицу всеславную Марфу. /
Велия сила чудес Твоих, / Богомати, спаси Тя
величающия.

И ныне праздника, глас 2

Двери Небесныя, / возмיתесь, / зряще дверь
Вышняго, / идущу со славою / к Сыну и Богу.

НА ВЕЛИЦЕЙ ВЕЧЕРНИ

На Господи, возвах: стихиры праздника, глас 1

О, дивное чудо! / Источник Жизни / во гробе
полагается, / и лествица к Небеси гроб бывает. /
Веселися, Гефсимание, / Богородичен святой
доме. / Возопием, вернии, / Гавриила имуще
чиноначальника: / Благодатная, радуйся, / с

Тобою Господь,/ подавай миру Тобою велию милость.

Дивны Твоя тайны, Богородице:/ Вышняго престол/ явилася еси, Владычице,/ и от земли к Небеси преставилася еси днесь./ Слава Твоя боголепная,/ богоподобными сияющи чудесы./ Девы с Материю Царёвою,/ на высоту вознесошася./ Благодатная, радуйся,/ с Тобою Господь,/ подавай миру Тобою велию милость. Твое славят успение/ Власти и Престоли,/ Начала и Господства,/ Силы и Херувими и страшнии Серафими,/ радуются земнороднии,/ о Божественней Твоей славе красящее я,/ припадают людие со Архангелы и Ангелы и воспевают:/ Благодатная, радуйся,/ с Тобою Господь,/ подавай миру Тобою велию милость.

Ины стихиры святых, глас 4

Светися, обитель Божия Матере, и веселися,/ ныне воистину священный и радостный наста праздник,/ непорочную невесту Христову венчаем песенными цветы./ Небеса убо достойно да веселятся, земля же да радуется,/ инокини же твоими, Марфо, молитвами хранимы, ликуют,/ спасаеши от напастей нечаемых и бед/ и благодать исцелений подаеши/ совершающим светозарную память твою.

Дивны Твоя тайны, Богородице:/ явила бо еси в Дивееве последний удел Твой во вселенней,/ дарования всех жребиев Твоих имущий/ и благодать обильную Всесвятаго Духа Божия,/ ныне обогатившийся мощами преподобных жен во обители сей просиявших/ Александры и Елены с ними же и Марфы,/ одесную Тебе предстоящей,/ приведется бо вслед Тебе искренняя Твоя послушница,/ в веселии и радовании в храм небесный введется/ и Всемиловитому Спасу о спасении нашем тепле молится,/ / даровати душам нашим мир и велию милость.

О, преподобная мати наша Марфо,/ измлада Господа возлюбившая/ и Ему усердно во обители сей послужившая/ юная собеседнице и любимая послушнице преподобнаго Серафима,/ начальницею Небеснаго Дивеева им нареченная,/ непрестанную молитву Иисусову стяжавшая и великия схимы от Господа удостоившаяся,/ ныне в мощах почиваеши и исцеления всем с верою и любовью к тебе притекающим источаеши,/ / темже усердно молим тя: помяни нас у Престола Божия.

Глас 8

Преподобная мати наша Марфо,/ Жениха Христа издѣтска возжелевшая,/ свещу твою светло уготовала еси,/ добродетельми духовно

просиявши, славная, / преставилася еси
божественно радующися, / на Небеси ныне
Престолу Божию предстоиши, / на земли духом
любве с нами пребываеши, / имеющи велие
дерзновение ко Господу и Пречистей Его
Матери, // темже молися от бед избавити
любовию величающих тя.

Преподобная мати наша Марфо, / небесною
чистотою просияла еси, / Чистыя Девы
служительница верная явилася еси, / прими
малое моление наше, / милостива буди тя
призывающим, / страстей мрачную бурю
отжени, / скорбь и стенания сердечная преложи
на радость, / ко пристанищу тишины
божественныя настави, / от отчаяния сохрани,
недужныя скоро исцели / и моли непрестанно
Небесе и земли Царицу / сохранить обитель сию
от наветов вражиих небориму // и спаситися
душам нашим.

Слава, глас 8

Преподобная мати Марфо всехвальная, / любовь
имела еси, совершение добродетелей, / тайны
будущия, предреченныя преподобным
Серафимом / об обители Дивеевской и великой
славе ея хранила еси, / наставлениям старца
верно последовала еси, / чиста, кротка и
непорочна была еси, / Царствие Божие внутрь
себе стяжавши, / всем житием своим Создателю

послуживши,/ Егоже возлюбила еси, Егоже ради подвизалася еси,/ Емуже о нас молися во Царствии Небеснем.

И ныне, праздника, глас 6

Приидите, всемирное успение/ Всенепорочныя Богородицы празднуем,/ днесь бо Ангели торжествуют/ честное преставление Божия Матере/ и к веселию нас, земных, призывают/ вопити немолчным гласом:/ радуйся, преставльшаяся от земли и к Небесным обителем пресельдаяся./ Радуйся, яже ученический лик облаком легким во едино собравшая./ Радуйся, упование и спасение наше,/ Тя бо христианский род непрестанно ублажает.

Вход. Прокимен дне.

Премудрости Соломоновы чтение (Глава 3)

Праведных души в руце Божией, и не прикоснется их мука. Непщевани быша в очесех безумных умерети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И вмапе наказане бывше, великими благодетельствовани будут, яко Бог искуси я, и обрете их достойны себе. Яко злато в горниле искуси их, и яко всеплодие жертвенное прият я. И во время посещения их возсияют, и яко искры

по стеблию потекут. Судят языком и обладают людьми, и воцарится Господь в них во веки. Надеющиеся Нань разумеют истину, и вернии в любви пребудут Ему: яко благодать и милость в преподобных Его и посещение во избранных Его.

Премудрости Соломоновы чтение (Главы 5 и 6)

Праведницы во веки живут, и в Господе мзда их: и попечение их у Вышняго. Сего ради примут царствие благолепия и венец доброты от руки Господни: зане десницею покрывает я, и мышцею защитит их. Приимет всеоружие рвение свое, и вооружит тварь в месть врагом. Облечется в броня правды, и возложит шлем, суд нелицемерен. Приимет щит непобедимый преподобие. Поострит же напрасный гнев во оружие: споборет же с ним мир на безумныя. Пойдут праволучныя стрелы мблниины, и яко от благокругла лука облаков, на намерение полетят. И от каменометныя ярости исполнь падут грады. Вознегодует на них вода морская, реки же потопят я нагло. Сопротив станет им дух силы, и яко вихорь развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навикните, судии концев земли. Внушите,

держащие множества и гордящиеся о народах языков, яко дана есть от Господа держава вам и сила от Вышняго.

Премудрости Соломоновы чтение (Главы 4 и 5)

Праведник, аще постигнет скончаться, в покое будет. Старость бо честна не многолетна, ниже в числе лет исчисляется. Седина же есть мудрость человеком, и возраст старости, житие нескверное. Благоугоден Богови быв, возлюблен бысть, и живой посреде грешник преставлен бысть. Восхищен бысть, да не злоба изменит разума его, или лесь прельстит душу его. Рачение бо злобы помрачает добрая, и парение похоти пременяет ум незлобив. Скончався в мале, исполни лета долго: угодно бо бе Господеви душа его. Сего ради потщася от среды лукавствия. Людие же видевшие, и не разумевше, ниже положше в помышлении таковое: яко благодать и милость в преподобных Его, и посещение во избранных Его.

На литии стихира, глас 6

Днесь созывается к веселию вся Нижегородская земля / и обитель Дивеевская торжествует: / наста бо память преставления Марфы преподобныя, / во цвете юности избравшей

тесную стезю./ Любовию Христовою
побеждаема,/ Небесным Серафимам отроковица
уподобилася есть,/ ныне приносим ей
похвальная,/ не песньми токмо славяще, но и
житию подражати желающе/ и славу Богу
воздающе/ за таковую теплую молитвенницу о
душах наших.

**На стиховне стихиры, глас 2 Подобен: Егда от
древа**

Любовию Божественною измлада
возгоревшись,/ преподобная мати наша
Марфо,/ кротость, чистоту стяжавши и
смирение,/ послушание Царицы Небесныя и
старца Серафима исполнила еси/ и
начальницею Небеснаго Дивеева ими
нареченная,/ /ныне ликуеши во Царствии
Небеснем.

Стих: Дивен Бог во святых своих, Бог Израилев.
Дивная отроковице,/ преславное житие твое —
монашествующих украшение,/ от юных лет бо
Христу от всея души последовала еси/ и аки
ангел на земли пожила еси,/ в подвизах
неутомимая даже до смерти, мати наша Марфо.

**Стих: Честна пред Господем смерть
преподобных Его.**

Веселися обитель Дивеевская,/ имущи в себе
сокровище многоценное/ честныя мощи Марфы

досточудныя,/ источают бо обильныя дары
целебныя/ с верою и любовью притекающим к
ним.

Слава, глас 7

Егда свет Божественныя любви возсия в сердце
твоом/ и во обитель Дивеевскую вселилася еси,/
дух горящий непрестанно ко Господу возносила
еси,/ от духовнаго отца своего преподобнаго
Серафима наставляема,/ тогда исполнилася еси
изобильно благодати Духа Святаго,/ ныне ко
спасению буди наставница величающим тя, //
Марфо приснопамятная.

И ныне праздника, глас 8

Девичестии лица/ днесь тайно одру Девы и
Матере окрест предстоят,/ и, души праведных
обступивше, Царицу славят./ Ови убо яко дар
девство вместо мира приносят,/ ови же
невещественное пение с добродетелию
приносят:/ подобает бо Матери Божии яко
Царице/ царскими добродетельми
светлосияющими дориноситися./ С нимиже и
мы, житие чистое совнесше,/ изыдем к
погребению сущия Матере Бога нашего,/
пеньми и песньми духовными/ согласно Ю
ублажающе.

НА УТРЕНИ

Тропарь святыя, глас 2

Равноангельное житие стяжавшая, «дивная отроковице»/ и собеседнице преподобнаго Серафима,/ госпоже и мати наша Марфо,/ ныне в мощех почиваеши/ и у Престола Божия предстоиши,/ моли о нас Милостиваго Бога, Небеснаго Дивеева начальнице.

По 1-м стихословию, седален, глас 7

Возсиявши яко звезда утренняя,/ яко светлое солнце память честная преподобныя Марфы,/ просвещает жительствующия на месте сем/ и согревает монашествующих сердца к подражанию жития ея постническаго/ к ревности о вере Христовой.

Слава и ныне праздника, седален, глас 4

Велением Зиждителя Твоего, рождшагося из Тебе,/ облак собрав апостолы Твое видети преставление./ Темже и со славою и многим веселием погребоша,/ воспевающе пречистое тело Твоего блаженства, Мати Христа Бога.

По 2-м стихословию седален, глас 1

Осияема ныне непрестанною славою Пресвятыя Троицы, мати наша Марфо,/ и Божественнаго веселия и радости исполнена,/ тепле о нас молися у Престола Пресвятыя Троицы

избавитися нам муки вечныя.

Слава и ныне праздника, седален, глас 4

Апостольский лик, рассеянный по земли, собрася в Сионе, / да предпослет от земли Богородицу к Вышнему, Егоже роди. / Силы Небесныя премирныя предтечаху, вкупе и ликоваху, духовне зовуще: / веселитесь, Небеса, приемше Божию Матерь, / Иже владычествует видимыми и невидимыми.

Величание:

Ублажаем тя, преподобная мати наша Марфо, и чтим святую память твою, ты бо молиши о нас Христа Бога нашего.

По полиелеи седален, глас 1

Невеста прекрасная Чертога Царскаго / преподобная Марфо / в послушании, воздержании и молитве / в обители нашей просиявшая и Начальницей Небеснаго Дивеева Богородицею избранная, молися прилежно о спасении душ наших.

Слава и ныне праздника, седален, глас 4

Возопий, Давиде, что сей праздник, / егоже воспел еси древле в книзе псаломстей? / Яко Дщерь, Богоотроковицу и Деву, преложи Ю на оны обители Христос, / Иже из Нея без Семене рождся. / И сего ради радуются матери, и дщери, и невесты Христовы, вопиюще: / радуйся, преставившаяся к Вышнему

Царствию.

Прокимен: Дивен Бог во святых Своих, Бог Израилев.

Стих: В церквах благословите Бога, Господа от источник израилевых.

Всякое дыхание:

Евангелие: от Матфея, зачало 104

По 50 псалме стихира, глас 6

Марфо богоносная, / послушание и безмолвие от юности возлюбившая, / чадо возлюбленное преподобнаго Серафима, / просиявшая в молитве и посте, / крест скорбей, болезней и трудов даже до смерти понесшая / Христа ради Небеснаго Жениха, / венцы многими от Него украшенная, / молися о чтущих тя.

КАНОН, глас 8 Песнь 1

Ирмос: Колесницегонителя:

Боже всех, дар словесе подаждь ми, Твоему рабу, / ныне начинающему хвалити песньми в Четвертом уделе Божия Матере просиявшую отроковицу дивную, преподобную мать нашу Марфу.

Преподобную Марфу песньми почтим, / благословение Пресвятыя Девы исполнившую, / велия бо есть угодница Божия, / наша теплая предстательница и молитвенница непрестанная о спасении душ наших.

Праведно есть восхвалити преподобную Марфу, / отроковицу непорочную, в подвизех с древними отцами равночестную / и Небеснаго Дивеева начальницу.

Богородичен: Радуйся, Пресвятая Госпоже, освятившая Дивеево Твоим пришествием, / радуйся, насадившая веру истинную, радуйся, собравшая монашествующих множество.

Песнь 3

Ирмос: Небеснаго круга:

Великое смотрение Божие от утробы материи тя освяти / и сосуд показа благоприятен Святаго Духа, / темже от младенства присно была Божию Материю ограждаема.

Вкоренившееся в души твоей желание неизреченное красоты Христовы стяжавши, / радостно с сестрою Параскевою к старцу Серафиму в дальнюю пустынку потекла еси. Мужество души твоея провидя, преподобный Серафим / в Дивеевскую общину отроковицу тя, тринадцати лет сущую, / жительствовати направи.

Богородичен: Радуйся, во Удел Себе Дивеево избравшая, / радуйся, Заступницею места сего быти изволившая; / радуйся, верным, пребывающим зде, Подательнице земных благ; /

радуйся, Споручнице вечнаго их спасения.

Кондак и икос праздника Слава, седален, глас 2

Вся временная мира сего презревши, /
Небеснаго возжелела еси. / Молчанием,
кротостию и смирением от юности твоея образ
равноангельнаго жития явила еси, / Небеснаго
Дивеева начальнице, / преподобная мати наша
Марфо.

И ныне праздника

Всечестный лик премудрых апостол собрася
чудно / погребсти славно тело Твое пречистое,
Богородице Всепетая. / С нимиже воспеша и
Ангел множество, преставление Твое честно
хваляще, / еже верою празднуем.

Песнь 4

Ирмос: Ты моя крепость, Господи:

Царствие Божие внутри тебе сущее измлада
познала еси и житие твое краткое подвигами
суровыми украсила еси, любовь к Жениху
Небесному горящи.

Стопами Богоотроковицы Марии шествовала
еси, служение Марфы и Марии соединяючи, яко
Марфа в послушании пребывши и яко Мария
выну при ногу Иисусову приседящи.

Пищею молитву непрестанную имаше, в
кротости небесней и молчании во обители

пожила еси, / Марфо всехваляная, чадо возлюбленное преподобнаго Серафима.

Бога возлюбивши от всея души, преподобная, / в целомудрии и подвизех сестер всех превзошла еси / и в молитве непрестанной дух ко Господу возносила еси.

Богородичен: Радуйся, теплая Ходатаице о живущих в Четвертом Жребии Твоем; / радуйся, милость Сына Твоего до скончания века месту сему обещавшая; / радуйся, радости и спасение душ наших.

Песнь 5

***Ирмос:** Вскую мя отринул еси:*

Спасительным именем Иисусовым поучалася еси присно, / ведуще Единого Христа и Сего распята, / ум свой просвещаючи Божественным Светом, / сердце же услаждаючи умилением и радостью, / юже молитвами твоими и нам подавай, поминающим тя.

Песнь сугубую приношу твоему терпению и кротости, мати Марфо, / како смирялася еси, болезни и скорби иноческаго жития мужески претерпеваючи.

Собеседнице и любимая послушнице преподобнаго Серафима, Марфо юная, / изрядно во обители потрудилася еси и в молчании выну пребывала еси, / тайны будущия славы обители

Дивеевския сохраняючи.

Богородичен: Радуйся, Дево, яко благословением Твоим осени Дивеево сила Вышняго;/ радуйся, яко обитель Твоя наполнишася подвижающимися;/ радуйся, яко просия zde множество преподобных, молящихся о спасении душ наших.

Песнь 6

Ирмос: Очисти мя, Спасе:

Труды постническими и медом безстрастия наслаждалася еси,/ скрываючи себе мирскаго жития в общине преподобных Александры и ея подвигом ревнующи.

Безплотную во плоти видеша ты сестры твоя,/ во отрочестве паче стариц духовно просиявшую. Многоразличныя подвиги во обители Дивеевской совершивши,/ сими от земли воспарила еси во Обители Небесных,/ яко золотая голубица,/ идеже помяни и нас, восхваляющих тя.

Богородичен: Радуйся, яко на наследие Твое присно призираеши;/ радуйся, яко благодати и милости Своея сподобляеши нас;/ радуйся, благословение Сына Твоего на нас низводящая.

Кондак, глас 8

Небесною кротостию, молчанием и неземною

радостью исполнилася еси, / юная и невиданная
доселе в Дивееве отроковице, / преподобная
мати наша Марфо, / в великую схиму от
преподобнаго Серафима облеченная, / темже
водворилася еси с мудрыми девами в Небесном
чертозе / и со Ангелы Всецарю непрестанно
предстоиши.

Икос

Вся силы небесныя радостно прияша душу
твою, преподобная мати Марфо, / и вознесоша ю
во Обители Небесныя, идеже ныне почиваеши
близ Пресвятыя Троицы, / начальницею
Небеснаго Дивеева нареченная и велие
дерзновение у Господа улучившая, / не забывай
о нас, земных чадах твоих, и поминай нас у
Престола Божия.

Песнь 7

Ирмос: Отроцы еврейстии в пеци:

Дивно долготерпение твое, о мати Марфо, ибо
велия скорби и болезни яко дар Божий
восприяла еси. Укрепи нас молитвами твоими, в
нетерпении и малодушии изнемогающих,
болезни пути узкаго претерпети, имже в вечный
живот внидем.

Жениха приити хотяща в полунощи, яко
слышавши, / не дала еси сна очима твоима, / но,

молитву Иисусову непрестанно творящи,/
мудрым девам сопричиталася еси.

Духовне зряще твое в высшия чины Херувимов
и Серафимов устремление, преподобный отец
наш Серафим в великий ангельский образ тебе,
отроковицу Марию, облече и схимонахиною
Марфою ты нарече.

Богородичен: Радуйся, всяких даров рабом
Твоим Всещедрая Подательнице;/ радуйся, во
брани, в болезнях и трудех их премилосердая
Утешительнице;/ радуйся, надеждо и спасение
душ наших.

Песнь 8

***Ирмос:** Седмерицею пещь:*

От ревности святей силы телесныя даже до
смерти истожила еси, камень за камнем в
построение храма Божия полагаючи, и тако в
трудех и молитве непрестанной душу святую в
руце Божии предала еси.

Плакаше преподобный Серафим, кончину
блаженныя Марфы духом предуведевший, / и
душу ея в Царствии Небеснем близ Святыя
Троицы узрел есть.

Царица Небесе и земли по отшествии твоём,
прияла есть ты, мати Марфо, безмолвием и
молитвою Ей много угодившую, в лик святых
дев, Ею возлюбленных и Ей у Престола Божия

сопредстоящих.

Богородичен: Радуйся, Хранительнице наша в настоящем веце;/ радуйся, Предстательнице и непостыдное упование в будущем;/ радуйся, прилог всякаго зла от жребия Своего последнего отражающая.

Песнь 9

Ирмос: Ужасеся о сем Небо:

Преподобная мати наша Марфо, Царицы Небесныя послушнице истинная, начала тьмы пособием Ея победивши,/ плоть умертвивши и дух ожививши,/ благодати приявшая Божественное действо,/ не престай молящися за ны ко Господу.

Победила еси тьмочисленная коварства врага, стезею тесною шествовавши,/ и

Подвигоположнику Господу угодила еси,/ от Негоже венец приемши,/ чудес источник стяжала еси, светлое воздаяние.

Божественная рака мощей твоих благоухает паче иных аромат, чувства всех и сердца услаждаючи, преподобная,/ притекающих в храм Рождества Пречистыя Богородицы.

Юже ти раболепно принесох, окаянный, песнь приими, преблаженная мати,/ и воздаждь свыше благодать, недугов избавляючи и искушений,/ внемга судити ми ся, представши,

избави мучения, собеседнице Ангелов.

Богородичен: Песни благодарственныя вси мы в обители сей святой живущии приносим Ти, Мати Божия, / яко спасаеши нас присно от всякаго обстояния, / питаеши, устрояеши и о нас промышляеши. / Но молим Ти ся, / и Божествеинаго Царствия по кончине нашей сподоби нас.

Светилен, Подобен: Чертог Твой

Радуйся, Дивеевская обитель славная, / молитвенницу имуци просиявшую в тебе / преподобную мати Марфу / вкупе с преподобными Александрою и Еленою, / днесь о нас молящихся прилежно избавитися нам муки вечныя.

На хвалитех Стихиры праздника на 5, глас 4 Подобен: Яко добля:

В славном успении Твоем / Небеса радуются, / и ангельская возрадовашася воинства, / вся же земля веселится, песнь Тебе исходную провозглашаючи, / Матери всеми Владычествующаго, / Неискусобрачная Пресвятая Дево, // Яже род человеческий избавлыная прародительнаго осуждения. От конец стекошася апостолов лучшии, / богоначальным мановением, погребсти Тя, / и от

земли вземлему Тя к высоте зряще,/ глас
Гавриилов радостию вопияху Тебе:/ радуйся,
Носило Божества всего./ Радуйся, Едина,
земная с Вышними/ Рождеством Твоим
совокупляя.

Яже живот рождающая,/ к жизни преминала еси,/
честным успением Твоим, бессмертной,/
дориносящим Тя Ангелом, Началом и Силам,/
апостолом и пророком и всей твари,/ приемшу
же нетленными дланьми Сыну Твоему/
непорочную душу Твою,/ Дево Мати
Богоневесто.

Стихиры преподобных Марфы, глас

5, Подобен: Радуйся

Радуйся, Небеснаго Дивеева начальнице,/
преподобная мати наша Марфо,/ яко небо
светлыми звездами украшаемо,/ житие твое
многими подвиги преисполнено;/
младенствующи леты, духовною крепостию
утвердилася еси/ и от Господа великия схимы
удостоилася еси;/ помози и нам неленостно во
спасение трудиться/ и единому Богу
послужити,/ Егоже моли даровати душам
нашим мир и велию милость.

Радуйся, дивная и несравненная отроковице,/
яко крин любовью Божественною процветшая,/
выну возносила еси свой горящий дух ко

Господу,/ юным сердцем возлюбивши Жениха
Небеснаго;/ радуйся, преподобнаго Серафима
сотаиннице,/ любительнице безмолвия и
целомудрия,/ ликом мудрых дев сочетавшаяся/
и Христу уневестившаяся светло,/ испроси
притекающим к раце твоей цельбоносней/
печалей утолнение, болезней исцеление,/
благодать в подвизах любви и смиреннаго
ближним служения,/ и душам нашим мир и
велию милость.

Радуйся, преподобная мати наша Марфо,/
начальнице Дивеева Небеснаго,/ в бдениих и
молитвах неутомимая,/ лоза плодовита во
младых летех явилася еси,/ показавши, яко
воистину возраст старости — житие
нескверное,/ кончиною благою скончавшая
житие твое/ и ныне со ангелы предстоящая
огнезрачному Престолу Вседержителя,/ поминай
чтущих успение твое честное/ и молися ко
Господу даровати душам нашим мир и велию
милость.

Слава, глас 8 «О преславнаго чудесе!»

О преславнаго чудесе!/ О новаго начинания,/
исполнение наста обетования всеславнаго:/
днесь Небесная Игумения обители
прославляется,/ ангелы, Богоневесто, удивляет
Твоих тайн глубина,/
Дивеево, Тобою возлюбленное, николиже

оставляеши/, и по кончине избранницы Твоея преподобныя Марфы/ явилася еси с нею во храме во свете несказанном,/ приемлещи бо ея молитвы за Обитель яко Милостивая.

И ныне праздника, глас 6

На безсмертное Твое успение,/ Богородице, Мати Живота,/ облацы апостолы по воздуху восхищаху,/ и, по миру рассеянные,/ во едином лице предсташа пресвятому Твоему телу,/ еже и погребше честно,/ глас Тебе Гавриил поюще, вопияху:/ радуйся, Благодатная Дево,/ Мати Безневестная, Господь с Тобою./ С нимиже, яко Сына Твоего и Бога нашего моли/ спастися душам нашим.

На литургии

Блаженны праздника песнь 7 на 4 и преп.

Марфе песнь 3 на 4

Прокимен, глас 4: Дивен Бог во святых Своих, Бог Израилев.

Стих: В церквах благословите Бога, Господа от источник Израилевых.

Апостол к Галатам, зач. 208

Аллилуиа, глас 1: Терпя потерпех Господа, и внят ми и услыша молитву мою.

Евангелие Матфея зач. 104 Причастен: В память вечную будет праведник.

